



Mart 13, 2010

Polazeći od činjenice da su imami i rukovodstvo IZ Bošnjaka u Americi odgovorni za čuvanje duhovnog zdravlja svojih članova, a s obzirom da su se preko pojedinih bosansko-hercegovačkih medija na ovom kontinentu u posljednje vrijeme počele nametljivo nametati osobe sumnjivih vrijednosti i namjera, i da smo od nekih naših članova dobili zahtjev da se oglasimo, UO IABNA se obratio Rijasetovom fetva-eminu za fetvu, mišljenje i savjet.

Saopćenje o vidovnjacima, čarobnjacima, magovima, vračarima i proricateljima

Imami su dužni da upozore svoje džematlije na sve što je štetno po njih i njihovu vjeru, te da na primjeren način, kroz hutbu i prigodan vaz, razotkriju šejtanske spletke i smicalice u što svakako spada pojava koju se spominje u navedenom pismu. Svi mi znamo da je islam došao s ciljem da ljude izbavi iz robovanja raznim vidovnjacima, čarobnjacima, magovima, vračarima i proricateljima, koji koriste ljudsku znatiželju, lahkovjernost i nevolju, da ih namame u mrežu sujevreja i krivovjerja.

Vidovnjaštvo, proricanje sudbine, tzv. duhovno iscjeliteljstvo utemeljeno na spomenutim premisama, i sl. jesu oblici sujevjerja koje je u cjelini u suprotnosti s čistim tevhidom, tj. vjerovanjem da samo Uzvišeni Allah zna gajb - nepoznato, da On određuje i upravlja svim, i da se vjernici samo Njemu obraćaju i samo od Njega pomoć traže, a ne od kojekavih magova, gatara i vidovnjaka. Uzvišeni kaže: "Reci: "Niko, osim Allaha, ni na nebu ni na Zemlji, ne zna šta će se dogoditi..." (En-Neml, 65) "U Njega su ključevi svih tajni, samo ih On zna." (El-En'am, 59) Zato, obraćanje takvima je obraćanje prevarantima i ribarima



ljudskih duša, koji zloupotrebljavaju ljudske nevolje i lakovjernost radi sticanja haram zarade, te je kao takvo i samo zabranjeno (haram), jer predstavlja potpomaganje u grijehu. Haram je i uzimati davati novac u takve svrhe, kao što je haram vjerovati u ono što te osobe kazuju. Haram zarada se u spomenutom slučaju stiče posredstvom cijene telefonskih impulsa. Informacije koje se tokom razgovora s takvim osobama iznose mogu, također, biti zloupotrebene u različite svrhe. Iznoseći takve informacije o sebi i svojoj porodici, kao i o drugim ljudima, vjernik čini dodatni grijeh, budući da omogućuje prevarantima i zlonamjernicima raznih vrsta nove zloupotrebe tih informacija. Uzvišeni Kaže: "Sarađujte u dobru i bogobožnosti, a nemojte sarađivati u grijehu i činjenju nepravde i nasilja!" (El-Maida, 2) Poslanik a.s. kaže u jednom hadisu: "Ko ode vidovnjaku ili vračaru, pa ga upita o nečemu i povjeruje u ono što mu ovaj kaže, zanijekao je ono što je objavljeno Muhammedu a.s." (Zabilježili su ga Ahmed, Tirmizi i Hakim, koji ga je ocijenio vjerodostojnim uz potvrdu drugih muhaddisa) Također, Poslanik a.s. je rekao: "Ne pripada nama onaj koji se bavi vraćanjem kao ni onaj kome se to čini." (Zabilježili su ga Taberani i Bezzar dobrim senedom)

Posebnu osudu zavređuju osobe koje se u tom svom haram poslu pozivaju na vjeru, zloupotrebljavaju kur'anske ajete i sl. kako bi bili što uvjerljiviji u svom govoru. Vjernici trebaju biti oprezni i u slučaju da dođu u sumnju i nedoumicu, trebaju se obratiti svom imamu i pitati za rješenje, odnosno kako da postupe u odnosnom slučaju.

Mahsuz selam,

Dr. Enes Ljevaković, fetva-emin